

## ACTE DE CONCESSION DEL IV CONCORS DE RACONTES BRÈUS ENRIC GARRIGA TRULLOLS

Los membres de la Jurada del IV Concors de racontes brèus *Enric Garriga Trullols*, convocat pel CAÒC, an lo plaser de vos notificar que, après los tres torns de deliberacions seguits, son arribats a la decision de concedir:

- lo 1r prèmi al raconté titolat *Acampada de familha*, signat jos l'escaisnom de **Benazet Raberi: Jean-Marc Rabier**.
- lo 2d prèmi, al raconté titolat *Zibola*, signat jos l'escaisnom de **Bobí lo contejaire: Robèrt Pastor**.
- lo 3n prèmi, al raconté titolat *Un café dab Edoné*, signat jos l'escaisnom de **Braida: Jordi Ràfols i Brasó**.

Per aquesta quatrena edicion del Concors, son estats vint-e-sièis los racontes recebuts –, arribats dels quatre caps d'Occitània e de Catalonha, e mai d'endacòm mai, coma Galícia o París.


E sèm uroses de notar un còp de mai la qualitat requista d'un bon pro dels tèxtes mandats, tant per çò qu'es l'expression, dins una lenga petejanta e mirgalhada que lo legeire pòt pas que se regalar a la legir e se daïssar menar de la man per ela, coma pel biais dels autors, que mestrejan l'art de debanar lors invencions e vos pivelar.

Va sens dire, donc, que lo plaser que la Jurada a esprovat a legir aquela garba de racontes es estat dels braves. Una garba ont tot i passa: de la languina que vos pren al ventre a la mòrt dels qu'aimatz o la solesa dels que son a mand de tot pèdre, a la jòia e l'innocència dels pichons, estonats davant l'amor que naseja, o los brams de plaser d'una party de pistachièrs. E que nos an menat d'un recanton perdut en Arièja o en Aran a la sèuva dels aztècas, l'Imalaia o lo Japon d'abans la guèrra, per i encontrar tot un cortègi de personatges susprenents, ambe de formigas que parlan, tuaires de massa, un comitat de mascas que benlèu ne son pas unas, un drac endormit... Una fèsta.

Los membres de la Jurada:

- Jaume Figueras i Trull, secretari. Professor e traductor.
- Manel Zabala Sánchez. Professor e escrivan.
- Meritxell Pueyo Sotos. Vice-presidenta del CAOC.
- Ferriol Macip Bonet. Director del Jornalet.

Es al nom dels membres de la Jurada, donc, que coma Secretari signi aqueste acte al jorn de uèi, lo 27 d'abril de 2023.



Jaume Figueras i Trull,  
Secretari